

Kolosai

Pauloŋe Kolosai yengât akmâ Anutu ulilaŋep.

¹ Nâmâ Paulo Anutuŋe ikinŋaet hanŋaet akmâ meme akniŋdo Yesu Kristogât Aposologât âi mem manman. Nâ akto galanenŋe Timoteo yengât kulem ire kulemgoet.

² Netŋe Kolosai kepian gâtŋe han biwiyenande Yesu nânŋanmâ kepilâmai yengât kulem ire katyengiet. Anutu Ewenenŋe yâkŋe han kalem akyengimbo biwiyenŋe sândugeâkgât nânŋân.

³ Net Kembunenŋe Yesu Kristo yâkgât Ewenŋe Anutu are yengât akmâ sopŋe ârândânŋ mepai meanmâ ulilaŋmaet.

⁴ Yeŋe Yesu Kristo nânŋanmâ kepilâmai akto yâkgât kâmot kepia bikŋe bikŋe manmai yâk han kalem akyengimai aregât Anutu mepaimŋe memaet.

⁵ Amâ Anutuŋe himbimân wan me wan katyengiep gât egâlianmâ manmai arekŋe tânyengumbo Yesu nânŋanmâ luâk âmbâle okot âlep akyengimai. Aregât keiŋe âmâ den bunŋe nânŋâmbiâ miawakyengiep.

⁶ Akto den pat âlepŋe are yengâlân togombo emelâk nânŋâyi. Nânŋâm biwiyenŋe Yesugât katbiâ kinmap aregât bunŋe are yeŋe bo ewum pâpkomai. Akto Anutuŋe okot âlep akyengim damunyenŋe akberâm akto aregât den yengâlân togombo bunŋânâk nânŋâm agak meme hanâk

hanâk hepunbaen dâmbiâ bunje yengâlân miawagep hainâk den pat âlepne are hânne hânne arimbo aregât nângâmbiâ bunje miawakbiâp.

7 Akto galanenne Epaparañe Kristogât den lokomâk manmâ âi ire biwiñande lokom tân nengumapne Kristogât keñe dâm makyengimbo nângâyi.

8 Hain makyengimbo nângâm lokombiâ purik katmâ netgâlân togom hainâk Anutugât Heak âlepñande memene akyengimbo gala konok agañimai aregât den pat dâm maknengiep.

9 Yengât den pat are nângâm arekneak netne keñe katmâ yengât nângâm Anutugât keñe nângâñetgât biwiyeñân denne katbiap aregât ulilañiot. Akto ikeñe Heak âlepne are huñgun anđo yengâlân gem biwiyeñe mem pâron pando Anutugât keñe nângâmbiâ âmâ nângâ nângâyeñe miawakyeñgiwiap.

10 Kembuñe hain akyengimbo manmanyenñande yâkgât keñe makmâ miawakto yekto âlepne akbiâp. Akto areâk bo. Manman âlepne bunje are miawakyeñgiâkgât âi membei. Hain akmâ Anutugât keñe nângâm heñgemgom manbei.

11 Akto Kembuñe Wâtne humo pagalene olop are akyengimbo wâtñân kinmâ bâlene siâ siâ akyengiwaiân biwi helen bo nângâm kârikneâk manmâ âgâmbiâ biwiyeñe bo umalewiâp aregât herone akmâ manbeigât ulilañmaet.

12 Akmâ Ewenenne nen egon pagalenân wan me wan katnengiep are yâkgât kâmot olop membaengât ambonân ambonân aregât keñe aknengiep. Aregât okot owâiâk Ewenenne

mepaimņe memaet.

Yesuņe amâ Humonenņe.

¹³ Akto Anutuņe Hândâk Amboņaet kârikņânba mem kotgâ nenekmâ âmâ nanņe okot humo nânġaņmap yâkgât amukņân katnenegep.

¹⁴ Nanņaet keiņe hin. Yâkņe heņgemgonenekmapgât dosa puli puligât mânġinengimap.

¹⁵ Akto areâk bo. Nanņande Anutu bo ekmaen yâkgât tirip towat akmâ manmap. Akto hân bo miawagewân me kalewân ain Nanņande soņ gem malep.

¹⁶ Manmâ âmâ himbimân manmai are akto hânân manmai are akto luâk gegeņe akto âgâ âgâņe akto aņelo, akto luâk niambi akto hat sinduk akto sinduk baniara egekņe akto bo egekņe akto hutyeņân luâk keiņe keiņe wan me wan egekņe akto bo egekņe are hârogâk kalep. Hain akto Eweņande nanņaet pat dâm hâreaņep.

¹⁷ Yâk siâ me siâ hârok aregât ulikņân malep. Akto wan me wan emelâk inġon me egon wan me wan keiņe keiņe bo kalewân kârikņe manmâ gaepgât manmâ gap aregât kautņe manmap. Aregât wan me wan keiņe keiņe nanņaet wâtņân kinmap.

¹⁸ Akto nen yâkgât kâmotlupņe manden nengât kautņe manmap aregât wâtņânâk kinmaen. Akto yâk wan me wan keiņe aregât kautņe humo malâk dâm aregât Anutu Eweņande momoņânba yâk soņ mem agalep. Akmâ siâ me siâ hârok aregât lâwinņe kalep.

¹⁹ Aregât keiņe hin. Anutugât wan me wan arekņe nanņaelân talep are Anutuņe nâņgâmbo ârândâņ akmap.

²⁰ Akto wan me wan keiņe keiņe himbimân hânân haru kâlegen manmap arekņe nen olowâk gala konok akmâ menduguakmâ Anutu ikiņaelân dewatiwaengât nanņe huņgunanĵo hânân gembo lâwinân kombiâ gilâmņe gembo mondo arekņe nen Anutu olop gala konok mannegât dâp miawagep.

Yesugât momoņande golâ menenegep.

²¹ Akto ye emelâk Anutu gasa agaņmâ hamianmâ hepun nenegâk dâmini agak meme arekņe bâleņe keiņe keiņe akmâ gam biwiyeņân lugum gaep.

²² Hain agep gârâmâ Kristo hâk sunum olop luâk akmâ miawakmâ mando kombiâ mondo Anutugât kuk bo akto Anutu olop gala konok manmâ gayi. Amâ Anutuņe sop humoân biwi nâņgâ nâņgâyeņe âlep salek salek dosayeņe bo katyeņgiwiapgât magep. Anutuņe hain makto Yesuņe moepgât Anutuņe yekto ârândâņ akto gala akyeņgiep.

²³ Aregât akmâ Anutuņe Yesugât den pat âlepņe are nâņgâm lokomâk kinmâ âmâ den pat âlepņe makmâ yeņgiyi are gulip akbop dâm biwiyeņande hikom manbei. Akto ulikņân siâņe Yesugât den pat âlepņe are dâm makyeņgiep. Den arekņe luâk kepiane kepiane hârok arimbo nâņgâņetgât den bunņe Paulo nâņe hoņ bawanę agaņman.

Pauloņe Yesugât kâmot yâk yeņgât akmâ âi humo miiep.

24 Akto Kristone, ikiye kâmotlupne yengât keiye bātne aregât hāk hilâlâm manmâ gaep. Hāk hilâlâm aregât bikne siâ tatâp aregât âi meman. Hain akmâ yengât dâm hāk hilâlâm nângâm manman aregât nângâre ârândân aktâp.

25 Akto Kristogât kâmotlupne ikiye hâkne hainare yengât hoŋ bawa akmâ Anutugât den keinjânbak dâm kepikmâ potatmâ yengire nângânetgât Yesune âi aregât dâm hârem niŋep.

26 Akto den aregât keiye yoŋ yoŋ talep aregât ulikjânbak luâk hârokne nângâwerâm manmâ gambiâ gambiâ yâk hârokne aregât ewum pâpkoyi, are âmâ unjak ire gârâmâ Anutune dâm miawakmâ kâmotlupne maknengiep.

27 Den yoŋ yoŋ talep are unjak Anutune mem miawakmâ kâmotlupne maknengiep. Amâ hin. Kristo biwiyenân manmap aregât herone akmâ Kristo nengâlân miawakbiapgât nângâenne kârikne akto manden. Akto Anutune makto luâk âmbâle hânne hânne manmaine agak memeyene bâlene hanâk hepunbiâ Kristo biwiyenân himbimgât manman kârikne are Yuda luâk nengât dâm makmâ hâriep hainâk yengât pat dâm hâre yengiwiapgât dâpne tatâp.

28 Haingât nenne âmâ luâkne luâkne are yengât nângâ nângâylene gulip akto nângâm hilipkowâigât akto Kristogât kâmot aknetgât Yesugât keiye dâm kepikmâ biwiyenân katmaen. Aregât nângâ nângâylene kepik akto konogâk akto nângâ nângâylene walakmâ humo akmâ âmâ Anutugât dewunnân salek salek kinnetgât akmaen.

29 Hain aktere Kristone kârikne mem owâineкто

âi aregâlâk mem metewiangât kaut orem meman.

2

Pauloŋe Kolosaigât akmâ hanokoagep.

¹ Galama, nâŋe keine nâŋgâŋetgât hin makyenŋiwe. Ye akto Laodikea kepien manmai arekŋe bo nekmai Yesugât kâmot yengât nâŋgâm kinmâ aregât âi ire biwinande kepeim kinmâ hâk hilâlâm owâiŋe bo nâŋgân.

²⁻³ Akto Yesu Kristogât keine yoŋâk yoŋâk talep aregât keine tek tekŋân ekmaen are hin. Anutuŋe ulikŋân nâŋgâ nâŋgâ keine heambugep arekŋe hinŋe nâŋgâ nâŋgâ amboŋe Kristo are huŋgun aŋdo ikinjaet kâmot are miawakyenŋimap. Nâ aregât nâŋgâm ye akto Laodikea gâtŋe gala konok agaŋim Anutugât keine Kristoŋe mem miawagep are nâŋgâm hengemgom bundâk dâm heroŋe maroŋe akbiâ biwiyenŋe owâi akmâ manŋet dâm aregâlâk nâŋgâm nâŋe âi ire biwinande kepeim ketugum hâk hilâlâm nâŋgâman.

⁴ Akto luâk siâŋe hianŋi den makto aregât ukenŋe nâŋgâmbiâ biwiyenŋe hâreakto ariwopgât aregât hain kulengoân.

⁵ Haingât ye kâlêwân manbiâ biwine yengâlân arimbo yengât nâŋgâyenŋim manman. Akto biwiyenŋe Yesugât kârikŋe katmâ kepeim manmâ damungom kindâigât biwine âlepŋe aktâp.

Luâk bikŋande hângât nâŋgâ nâŋgâgât den makbiâ bo nâŋgâwaen.

⁶ Akto ulikŋân ye Yesu himbimânba giep are Kotdânenŋe dâyi aregât hainâk yâkgât amukŋân manbei.

⁷ Akto lâwin bâlensiâ tiŋ tiŋ dâmbô kândârâŋe panmâ kârikŋe akto miawakmâ âgâm humo akmap dop hainâk biwiyenŋe ari kindo biwiyenande Yesu kepeim kârikŋe manbei. Akto ye olowâk biwinenŋe Yesugât katmâ Anutugât den lokom manmaen aregât denŋe emelâk dâm kepikmâ makyenŋiyion are watmâ arim kârikŋe akmâ Anutu âlepŋe dâm mepaimŋe humo mem manmâ âgâwai.

⁸ Dâ hinŋe wan me wan kâmbokŋe dâmai aregât keiŋe makyenŋire nâŋgâŋet. Luâk bikŋande yeŋe hanyenêak akmâ hianŋi den makyenŋimbiâ nâŋgâm biwiyenŋe bâliwop dâm aregât biwi golâ manbei. Den are âmâ emelâk humomolupyenjaet biwiyenân miawakto luâk kâmotŋe kâmotŋe dâm gambiâ den are âmâ hângât wan me wan kârikŋe akto lâuwânŋe makmâ manbai amâ Yesu Kristo yâkgât den bo.

⁹ Nâŋgâi? Anutugât dâp are Kristo hâk biwiŋân sambelem pikmâ ârândâŋ akmâ yendâp.

¹⁰ Aregât ye yâkgâlân wan me wan siâ bo mesakbai. Yâkŋe âmâ dâtŋe meme akto luâk kotdâ hârok yâk yenŋât kautŋe damunyenŋe akmâ manmap.

¹¹ Yâkgâlân ba gai tirip yeŋe gai meyi. Bâtŋe hâknennân tirip gâi gâigât aregât bo. Kristonŋe meyekmâ ikinŋe tirip hâk biwiyenân kulemgom yenŋiep.

¹² Akto Kristo hâkgât agak meme mem mondo hangoyi dop hainâk akmâ hâkgât agak meme hepunbiâ tu puli yekbiâ yâkgâlân dewatiyi. Akto Anutonŋe wâtŋe âlepŋe talanmapgât Yesu mem momonânba mem agalep dop hainâk biwiyenŋe Yesugât katbiâ tu puliyegigât Anutonŋe mem

agatyekmâ manman kârikne aregât pat dâm hâreyengiep are mendâi.

¹³ Akto ye emelâk hâkyenân tirip bâlâk manmâ Anutugât dopnân bo akmâ bâleje maleje keije keije mem maligât hememgât pat akbiâ momogât dâp miawakyengiep. Amâ unak ire gârâmâ Anutuje dosayenje hepunmâ Yesu Kristo momonânba mem agato mandâp hainâk golâ katmâ meyekto himbingât manman aregât pat emelâk aktâi. Dâ yengâlâk bo. Dosa nenje hârok hepunnengiep.

¹⁴ Aregât hin agep. Mosegât den kârikne den âiân katnenekto dosanenje miawagep nângâenje lokowaen dopje bo tatnengimbo umatje dondâ bâleje miawaktâp. Umatje are Anutuje Yesugâlân kato aregât lâwinân kombiâ moep. Mondo ainâk den kârikne Moseje kulemgoepp arekne damunnenje agepgât âi bo agep.

¹⁵ Hain akto âmâ Yesuje sinduk baniara hewukne akto luâk niambi akto luâk emet amboje keije keije areyengât wâtyenje mem gem âmâ keiyenje tânjâk yânje are tek tekjân mem miawakto anjun humo yengimbo luâk âmbâle herone nângâyion.

¹⁶ Haingât luâk bikjande âmâ sot tu nem manbiâ bo ârândâj akmâp me hombanj keije keije tatmai me wan me wan akmâ manbai me âi bo meme sopje me delem dewunje aregât hilâm tatmâ nângâmai aregât dâm mem katyekberâm akbiâ âmâ den koyengiwai. Wangât? Hingât.

¹⁷ Makmâ wârakyengimai are âmâ bunje bo. Bunje âmâ titnan miawakbiap. Kristone mem miawakbiap.

¹⁸ Akto luâk bikjande yengâlân togom hin

dâm makyengimai “Hâkyeņe mem ge katmâ aņelo kotyeņe mem agatbiâ ainâk Anutuņe yekto huraguwiâp.” dâm hiaņgimai. Luâk hain aregât keiņe hin. Biwi nâņgâ nâņgâyeņe purik âgâmbo kulem are ekmâ aregâlâk nâņgâm bunņe dâm bâleņeâk nâņgâm hanyeņande nâņgâm âmâ hâkyeņeet ukenņe are memai. Hain arekņe yeņgâlân togom hain dâmbiâ âmâ Anutuņe egâlâņ olop katyeņgiep are mesokbâen dâm bo nâņgâ yeņgiwei.

¹⁹ Dâ areâk bo. Yesu nengât kautnenņe manmap dâm hiaņgimai arekņe biwiyeņe Yesugâlân bo katmai yâk yeņgât denyeņe bo nâņgâwei. Yâk âmâ ye biwiyeņe âlepņe kali are nâņgâenņe bo ârândân aktâp dâmai aregât ye mem ge kat yekberâm akmai aregât denyeņe bo nâņgâwei. Akto Yesu nengât kautnenņe manmap dâm kulemgoân aregât keiņe hin. Nenņe yâkgât bâtņe keiņe ongâņe me hagitņe mandengât Anutuņe meme aknengimbo biwi konok akmâ Anutugât wâtņân kinmâ humo akmaen.

Ire bo nemben, are bo nemben, are bo nâņgâwei.

²⁰ Akto Yesu Kristo moep dop hainâk akmâ luâk areyeņgât biwiyeņân den are hamiaņgim Yesugâlân dewatiyigât yeņe luâk âmâle dondâ arekņe Yesugât hâkâņe akmâ hami aņmai are yeņgât denyeņe hanyeņeâk akmâ hân luâk yeņgât den are dâm makyengimbiâ are hanâk lokombiâ bâliâp.

²¹ Hân luâk arekņe hin makyengimai, “Are bo mem neņet.” dâm koyeņgimai. Akto, “Are bo mem ekņet” dâm makyengimai.

22 Dâ den hainare luâkneak hanyenande nângâm dâmai akto sot wan are nemiâ biwiyenân gem yânjân hin gem bo akmap. Aregât akmâ den hain are bo lokom manbei.

23 Akto yâkne yengât nângâm biwiyene wan me wan aregât akto sot bâlâk manmâ aregât hâkyene mem agatmâ yenaelâk nângâm den hain dâm makyenjimai, “Hain aktenne hâknenne egâlianmaen are bo akto Anutugât den kârikne âlepne lokoenne nenekmâ âlepne dâwiap.” Hain dâm nângâmai amâ nângâm gulip komai. Den hain arekne biwi nângâ nângâyeje bo tângomap. Akto han biwiyene egâlian gogâlean are bo mem ge kato yeukne akmap aregât bo nângâwei.

3

Anutune Yesu olop nen golâ katnenegep.

1 Anutune Kristo momonânba mem agalep hainâk momo dopjânba meyekto agali aregât âuren himbimân Anutugât bât bungen ain Kristo tatmap aregât han biwiyenande nângâmâk manbiâ humo akbiâp.

2 Amâ hânân siâ me siâ yendâp aregât bo nângâwei. Egon siâ me siâ yendâp aregâlâk han nângâ nângâyeje katbiâ tatbiâp.

3 Akto Kristone moep ye hainâk akbiâ aregât nângâ nângâyeje tâmbâne are bo agep. Aregât Anutune Kristogât akmâ manmanyene damunne akmâ kindo manmanyene yem âgâwiap. Akto bo bâliwiap.

4 Aregât Kristo yengât manman kâriknaet ambonjande lâuwâne miawakmâ gembo âmâ ye hainâk

miawakmâ agatbiâ pagalene âlepne dondâ ain olowâk manbai.

Agak meme irakñân kinmâ tâmbâne hamianbaen.

⁵ Hângât me hâkgât agak meme hamianmâ hâkyene damunne akmâ hengemgowe. Amâ hin. Dâp gulip agak meme me biwi helen me nângâ nângâ bâlene me egâlian bâlene are lâpiogât nângâmbiâ humo akmap hainare are hârokne damunyne akbopgât hâkyene damun akmâ manbai.

⁶ Wan me wan are hârokgât âmâ Anutugât hâune kuk bâlene hain akmai yâk yengâlân miawakbiap.

⁷ Akto ye ulikñân hângei agak meme are nângâmbiâ humo akto watmâ manmini.

⁸ Dâ hinne bâlene ire amâ hamianmâ manbei. Akto kuk bo agançiwei. Biwiyenân kuk bo akbei. Akto bo bâlene nângâ yengim dâm mem ge katyekbei. Akto galagât hogo hogo bo akmâ manbei.

⁹ Akto den bâlene bo makyençiwei. Hiançi den bo makyençiwei. Bo heyençiwei. Emelâk hângât nângâ nângâne akto agak memene are hami pali.

¹⁰ Panmâ Yesugâlân dewatiyi aregât Anutu manman irakne aregât ambone arekne biwi nângâ nângâyene âlepne anğâ lugu yengim ikinæet dopne aknetgât meme aknengimapgât aregât bâlene keine keine hamep panmâ manbei.

¹¹ Aregât Kristogâlân purik katmâ biwi konogâk katenne mem mendugu nenegep. Nen Yuda luâk me ye siân gâtne me Anutugât pat dâm hâk gâi nengiyi me bo gâiyençiyi me niñaelân dewatim dop ketugu yengiep me haruân gâtne me halângen gâtne me luâk kâit yengâlân gâtne

me hoŋ bawa me hoŋ bawa bo me mându me nanlupŋe okotne dâm yeŋgim mendugu yektâp yâkŋe hanyeŋeâk akmâ âi ketugumai are Anutuŋe nen hârok nenekto dop konogâk akten. Akto Kristo Kembu konok yâkgâlân dewatim manmaen âmâ nengât kautnenŋe mandâp.

¹² Akto Anutuŋe han kalemŋaet akmâ yekmâ nâŋgât dâtâne dosayeŋe bo dâm han kalemŋaet akmâ oloŋyekmâ ikiye nanŋe baratŋe yeŋgonlep aregât biwiyenande konogâk akmâ manmâ âmâ agak meme âlepŋe ire âmâ akmâ manbei. Umburuk me gegenŋe manmai are yekmâ okotyenŋe nâŋgâ yeŋgim tân yeŋguwei. Akto nâŋgâm bâli yeŋgimbiâ âmâ biwi kau akmâ damun akyenŋiwai. Akto galalupyenâet nâŋgâm bo makmâ mem ge katyekmâ yeŋaet hâkyenŋe bo mem agatbai. Akto denyenŋe kakŋân dâmbiâ den hâuŋe bo makyenŋiwei. Akto biwiyenân tuk tuk ewuyekbiâ âmâ bo biwi aguwai. A hârok lugu akmâ manbei.

¹³ Akto gala konok akmâ tân aguwai. Akto den umatŋe yeŋgât hutyenân miawakto ain biwi kau akmâ, “Humonenŋande emelâk dosanenŋe pan nengiep.” dâm aregât nâŋgâm dosayeŋe hep-unanŋiwai.

¹⁴ Akto siâ me siâ aregât kakŋân han kalem are mem luguakmâ manbiâ arekŋe siâ me siâ are mem mendugum kinmâ katipkombo agak meme konok ârândânŋ akbiâp.

¹⁵ Aregât Kristo lumbe amboŋe yâkgâlâk nâŋgâmbiâ biwiyenŋe sândugewiâp. Amâ ye kâmot konok akto han hâkyenŋe konogâk manŋetgât Anutuŋe kepilâyegepgât Anutu makmâ mepaimŋe mem agatmâ manbei.

16 Akto biwi nângâ nângâyene gulip akto hilip aguwaigât den dâm yengiep are nângâm lokomâk manmâ biwi nângâ nângâyene umbunânbak Kristogât den aregât keiŋe kepikmâ maganŋi goanŋi akmâ âmâ aregât dâm kârikŋe aganŋiwei. Akto ain âmâ mitigât kep are membai. Akto emelâk Dawidi hakunenne are akto luâklupŋe arekŋe Anutugât kep kulemgoyi are nângâm membei. Akto Anutugât Heakŋande biwiyenân tatmap aregât Anutu âlepŋe dâm mepaimŋe mem heronŋe akmâ aregât kep kenŋu membei.

17 Akto Yesuŋe ikinâelân purik katmâ manŋetgât Anutugât dâpŋe meyenŋiep. Aregât Anutu mepaimŋe mem âlepŋe dâm biwi yenande nângâmaiân akto bâtyenande mem ketugumaiân ain Yesu Koldânenne yâkgât nângâm biwiyenande kepeim manbei.

Luâkdâ âmbendâ nanaŋdâ yengât den.

18 Âmbâlema, yeâmâ luâklupyene lau lokoyenŋim manbei. Agak meme hainare Humonenŋande ekto huragumap.

19 Dâ luâk yeŋe âmâ âmbenlupyene damunyeŋe akmâ han kalem akmâ biwiyene yâk yengâlân katbiâ ain kinbiâp. Akto den dâtŋe âmâ bo dâm makyenŋiwei.

20 Dâ nanaŋ lepat ye âmâ hainâk ewe memelupyenâet wâtyenân kinmâ lau lokoyenŋiwai. Hain akbiâ Anutu Humonenŋande yekto ârândân akbiâp.

21 Ewe memelupyene yeŋe âmâ nanaŋ lepatlupyene biwiyene bâliwop dâm den sârek yengum

âmâ dewun yeŋân bo gem biwiyenân bo ewuyek-bei.

Hoŋ bawa yeŋgât den.

²² Hoŋ bawa yeŋe humomolupyene yâk yeŋgât lau hârok lokom metewei. Amâ humomolup-nenŋande nenekmâ kinbiâk âi mene hain bo nânŋâwei. Hanâk âi memâk manbei. Akto Kembu Humonenŋe yâkgât hamep akmâ biwi kau kau akmâ âi memâk manbei.

²³ Akto âi are ketugum hin dâwei, “Âi ire luâk yeŋgâlâk bo. Humogât ketugum manden.” hain dâm âi are hâk hilâlâm kakŋân ketugum manbei.

²⁴ Hain akbai dâm aregât Humoŋe pat dâm hâreyenŋiep are hâuŋe hâmbâi himbimân mem-biâ Humonenŋe Kristo are Kotdânenŋe humo manmapgât âi ketuguwaiân aregât nânŋâm bi-wiyenande kepeim hain akbai.

²⁵ Akto Anutuŋe luâk âmbâle âgâ âgâŋe me gegene keiyene konok nânŋâmap aregât bâlene akmâ mandâiŋe dosa mem aregât hâuŋe hâmbâi membai.

4

Luâk kotdâ yeŋgât den.

¹ Luâk kotdâ yeŋande hoŋ bawalupyene siâ me siâ ârândânâk akyenŋiwei. Anutu Kotdâ yeŋe agat agatŋe himbimân mandâpgât hoŋ bawalupyenæet damunyenŋe akmâ tâŋ tâŋâk akyenŋiwei.

Kembu hokboâk hokboâk ulilanŋaen.

² Akto Kolosai kepia ambolupŋe yeŋe kârikŋe manmâ Anutu manŋanmâ ulilanmâ âmâ

biwinenŋe golâ agâkdâm manmâ mepaimŋe manbei.

³ Hain akmâ nengât ulilanŋai. Nenŋe luâk âmbâle yânŋân manmai are Kristogât keiŋe dâm makyenŋinetgât Anutuŋe dâp menengiâkgât dâm ulilanŋbei. Den are dâm miawakmâ makyenŋireân den are hâkânŋ akmâ aregât lope kâlegen katnekbîâ tatman

⁴ aregât ulilanŋmâ tân nugumbîâ âmâ Kristogât den tikŋe are makmâ miawakyenŋire ârândânŋ akto hârokŋe nânŋâwai.

⁵ Anutugât den bonânŋâmai yâk olop peniangim kinmâ siâ me siâ akberâm ekmâ nânŋâm hengenŋoweï. Hain akmâ âi meme sopŋe bo hilipkoweï.

⁶ Akto denyenŋe are kâtembe pulimbîâ ukenŋe akbiapgât hainare akbei. Aregât benŋe luâk bikŋande den ire me are purik gurik makyenŋiwerâm akbiâ den hâuŋe ainâk owâiŋeâk makbei.

Tikiko akto Onesimo yâk yetgât den.

⁷ Nunaet den pat amâ Tikikoŋe makyenŋiwiap yâk âmâ gala akniŋmap akto dengât tânnugumbo ârândânŋ akmap akto Kembugât hoŋ bawa manmap.

⁸ Yâkŋe âmâ manman nenŋaet den pat makyenŋiâk akto biwiyenŋe hionjakbopgât tânyenŋuâkgât huŋgunanŋdere togoâp. Akto aregâlâk nânŋâre humo aktâp dâm huŋgunanŋdân.

⁹ Akto galanenŋe Onesimo yenŋât kepiân gâtŋe arekŋe âi wan me wan mendo ektenŋe ârândânŋ akmap yâk olop huŋgunyektere togom iregen

wan me wan miawaknengiep aregât den pat makyenjiwandat.

Den bâiŋe.

¹⁰ Aristako yâk olowâk Roma yengât lope kâlegen katnelekbiâ mandet yâkŋe yengât akmâ gala akyenjiâp. Akto Banabagât nepâŋe Mareko yâk gai gala akyenjiâp. Dâ ye âmâ emelâk Marekogât keiŋe makyenjiân yâk togowiawân gala aganbei.

¹¹ Akto luâk siâ kotŋe Yosua, kotŋe siâ Yusto yâkŋe yengât nâŋgâ yenjiâp. Akto Anutuŋe damunnene akbiapgât âi tân nugumai yâk yengâlânba luâk ya yengondân are konok Yuda luâkŋe tân nugumai. Hain akmâ okot kauâk akniŋmai.

¹² Akto yengâlân gâtŋe siâ kotŋe Eparara in togom mandâp. Manmâ Yesu Kristo hon bawa aganmap. Arekŋe nâŋgâ yengim gala den katyenjiâp. Yâkŋe yengât Anutu ulilandâp. Amâ Anutuŋe keiyene nâŋgâmap aregât keiŋe amukŋânba nâŋgâm lokom manmâ amâ aregât han lâuwâ bo akŋet dâm aregât kârikŋe ulilanmâ mandâp.

¹³ Akto nâŋe Epararagât keiŋe emelâk nâŋgângât yâkgât den pat bâlensiâ makyenjiwe. Yâk yengât akmâ Yesugât kâmot arekŋe Laodikea akto Hierapoli kepiân mandâi are yengât nâŋgâm tân yengum hâk hilâlâm kakŋân mandâp.

¹⁴ Galanene Luka yâk âmâ dokta âlepŋe akto luâk siâ kotŋe Dema yâkŋe den gala katyenjiwerâm aktat.

¹⁵ Akto nâŋe Yesugât kâmot arekŋe Laodikea kepiân mandâi akto âmbâle siâ kotŋe Nimpasi yâk

akto yâkgât emetnân menduguakmâ ain Yesugât akmâ mendugumai, yâk yengât nângâyengim heronje akyengiman are dâm makyengiwei.

¹⁶ Luâk âmbâle menduguakmâ kinbiâ âmâ kulem esenje ire mem dewunyenân kinmâ oyanbiâ nângâmbiâ aregât kaknân Yesugât kâmotnje Laodikea kepijan mandâi are oyanmâ nângâwaigât katbiâ ariwiap. Akto yâk yengât kulemgoân a hainâk are yengimbiâ oyanmâ nângâwai.

¹⁷ Akto luâk siâ kotnje Arikipo amâ hin dâm maganbai, “Humonenjande âi makmâ ginjep aregât biwigande kepeim lokom manmâ âgâmenâ bo agâk.”

¹⁸ Bâin luâk siânje kulem esenje ire kulemgom kindâpgât gâwu are niŋdo mem kotne kulemgoewe Paulo. Akto lope kâlegen mandângât nângât nângâ niŋmâ Anutu ulilanbei. Anutnje yengât okot akmâ damunyenje akmâ ye olop manbiâp.

Yusugât Pat Âlep Den
The New Testament in the Timbe Language of Papua
New Guinea
Nupela Testamen long tokples Timbe long Niugini

copyright © 1987 Wycliffe Bible Translators, Inc.

Language: Timbe

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 28 Dec 2024 from source files dated 31 Aug 2023

03f82704-6ad1-5094-a78e-e240d9f2d4f8